



Br: 3/2 - 900/26 - 2540

23. jul 2026.

IZVJEŠTAJ

o prisustvu delegacije Vlade Crne Gore, koju je predvodio potpredsjednik Vlade za međunarodne odnose i ministar vanjskih poslova mr Ervin Ibrahimović, na obilježavanju 31. godišnjice genocida u Srebrenici, Potočari, Bosna i Hercegovina, 11. jul 2026.

*Delegacija Vlade Crne Gore prisustvovala je u Potočarima, 11. jula 2026. obilježavanju 31. godišnjice genocida u Srebrenici. Na čelu delegacije Vlade Crne Gore bio je potpredsjednik Vlade za međunarodne odnose i ministar vanjskih poslova **Ervin Ibrahimović**. U sastavu delegacije Vlade Crne Gore, pored potpredsjednika Vlade i ministra vanjskih poslova **Ibrahimovića**, bili su i ministar javne uprave mr **Marash Dukaj**, ministarka rada, zapošljavanja i socijalnog dijaloga **Naida Nišić**, ministar socijalnog staranja, brige o porodici i demografije **Damir Gutić**, ministar regionalno-investicionog razvoja i saradnje sa nevladinim organizacijama **Ernad Suljević**, državni sekretar u Ministarstvu javne uprave **Naim Gjokaj** i državna sekretarka u Ministarstvu regionalno-investicionog razvoja i saradnje sa nevladinim organizacijama **Mirsada Bošnjak**. Obilježavanju je prisustvovala i otpravnica poslova a.i. u Ambasadi Crne Gore u Bosni i Hercegovini **Satka Hajdarpašić**. Centralni komemorativni program održan je u Memorijalnom centru Srebrenica-Potočari, u okviru obilježavanja godišnjice genocida počinjenog u julu 1995. nad Bošnjacima u zaštićenoj zoni Ujedinjenih nacija.*

Prisustvo delegacije imalo je za cilj odavanje pošte žrtvama genocida, izražavanje solidarnosti sa porodicama žrtava i potvrđivanje principijelnog stava Vlade Crne Gore u odnosu na očuvanje istine, pravdu, kulturu sjećanja i regionalno pomirenje. Učešće na komemoraciji istovremeno je predstavljalo nastavak institucionalnog odnosa Crne Gore prema Srebrenici, utemeljenog na osudi genocida, zabrani relativizacije ratnih zločina i podršci civilizacijskim vrijednostima na kojima počivaju demokratska društva.

Komemoracija je održana u prostoru nekadašnje Fabrike akumulatora, nakon čega je uslijedio vjerski dio programa i kolektivna dženaza. Ove godine u Memorijalnom centru Srebrenica-Potočari ukopani su posmrtni ostaci deset novoidentifikovanih žrtava genocida. Komemoraciji su prisustvovalе porodice žrtava, predstavnici institucija Bosne i Hercegovine, međunarodnih organizacija, diplomatskog kora i delegacije država regiona i šire međunarodne zajednice.

U okviru zvaničnog programa prisutnima na komemoraciji se, u ime delegacije Vlade Crne Gore, obratio ministar socijalnog staranja, brige o porodici i demografije **Damir Gutić**. U svom obraćanju **Gutić** je naglasio da riječi iz Potočara imaju posebnu moralnu težinu, jer mezarje Srebrenice „gleda i opominje” koliko duboko čovjek može pasti kada mržnja nadvlada savjest, a ćutnja postane saučesništvo. Poručio je da je Crna Gora, usvajanjem Rezolucije o Srebrenici i obilježavanjem Međunarodnog dana sjećanja na genocid, jasno

pokazala da stoji uz žrtve i njihove porodice, te da odnos prema Srebrenici predstavlja pitanje istine, pravde i ljudskog dostojanstva.

Posebno je ukazao da je u Skupštini Crne Gore prvi put otvorena izložba posvećena genocidu u Srebrenici, kako bi se kroz lica i imena nevino stradalih čuvalo sjećanje i spriječio zaborav. **Gutić** je istakao da kultura sjećanja za Crnu Goru nije prolazna obaveza, već temelj društva u kojem mladi treba da uče da se zločini ne smiju negirati niti ponoviti. Zaključio je porukom da istinu o Srebrenici treba braniti dostojanstveno i posvećeno, uz obavezu očuvanja mira i ljudskog dostojanstva.

Delegacija Crne Gore je po završetku komemorativnog dijela položila cvijeće ispred Spomen-kamena, odajući poštu žrtvama genocida, nakon čega je prisustvovala vjerskom dijelu programa i ukopu novoidentifikovanih žrtava.

Po završetku zvaničnog programa, potpredsjednik Vlade i ministar vanjskih poslova **Ibrahimović** sastao se sa predstavnicama udruženja Majke Srebrenice u njihovoj kući. Tom prilikom iskazano je duboko poštovanje prema žrtvama i porodicama, uz poruku da Crna Gora ostaje posvećena njegovanju kulture sjećanja, očuvanju istine, podršci pravdi i doprinosu pomirenju u regionu.

U izjavi za medije povodom prisustva delegacije Vlade Crne Gore u Potočarima, potpredsjednik Vlade i ministar vanjskih poslova **Ibrahimović** poručio je da Crna Gora ostaje posvećena njegovanju kulture sjećanja, očuvanju istine i podršci pravdi i pomirenju. Takva poruka dodatno je naglasila da prisustvo Crne Gore na obilježavanju godišnjice genocida u Srebrenici nije samo protokolarni čin, već izraz državnog kontinuiteta u odnosu prema žrtvama, porodicama preživjelih i utvrđenim činjenicama o genocidu.

U političkom i diplomatskom smislu, prisustvo delegacije Vlade Crne Gore u Potočarima imalo je značaj potvrde dobrosusjedskog odnosa prema Bosni i Hercegovini i posebne pažnje prema pitanjima suočavanja sa prošlošću, tranzicije pravde i regionalne stabilnosti.

Obilježavanje 31. godišnjice genocida u Srebrenici proteklo je u dostojanstvenoj atmosferi, uz snažne poruke o potrebi očuvanja istine, borbe protiv negiranja genocida i izgradnje trajnog mira. Učešće delegacije Vlade Crne Gore predstavlja nastavak politike dobrosusjedstva i regionalne odgovornosti, kao i potvrdu opredijeljenosti Crne Gore da, kao članica NATO-a i kandidat za članstvo u Evropskoj uniji, doprinosi stabilnosti, pomirenju i poštovanju univerzalnih ljudskih prava na Zapadnom Balkanu.

ZNAČAJ POSJETE

Delegacija Vlade Crne Gore, koju je predvodio potpredsjednik Vlade za međunarodne odnose i ministar vanjskih poslova mr **Ervin Ibrahimović**, je prisustvom obilježavanju 31. godišnjice genocida u Srebrenici potvrdila privrženost Crne Gore civilizacijskim i demokratskim vrijednostima koje je, u kontekstu sve glasnije revizionističke retorike na međunarodnoj političkoj sceni, potrebno konstantno isticati i braniti.

Učešće na obilježavanju 31. godišnjice genocida u Srebrenici je, u cjelini, ocijenjeno kao važan gest institucionalnog poštovanja prema žrtvama i preživjelim, kao i doprinos jačanju povjerenja između Crne Gore i Bosne i Hercegovine. Time je dodatno potvrđena spremnost Crne Gore da u regionalnom okviru nastavi da podržava procese suočavanja sa prošlošću, zaštite ljudskog dostojanstva i očuvanja mira. Učešće delegacije predstavlja jasnu poruku da Crna Gora pitanje Srebrenice posmatra kao pitanje univerzalne odgovornosti, poštovanja žrtava i odbrane utvrđenih pravnih i istorijskih činjenica.